

Gonçalo Neves

SKOPO NULA



Editerio Sudo

2024

Gonalo Neves

SKOPO NULA

30 haikuatra poemi originala

Editerio Sudo

Espinho, Portugal

decembro 2024



PREFACETO

Ica broshuro kontenas 30 haikuatra poemi quin me skriptis inter junio e novembro di 2024.

Quo esas “haikuatro”? Nu, simple, on povas dicar ke ol esas tri-versa poemeto sequanta la kustumala silabo-skemo di klasika haikuo (5-7-5) ma traktanta irga temo, do ne nur ceno spektata en la naturo.

Inter la 30 poemi en ca tomo, 14 ja aparis en la Facebook-grupo Ido-literaturo, e la cetera 16 aparas hike unesma-foye. En 2024 me skriptis multa deki de haikuatri, ofte katenizita e tale formacanta longa poemi. Nexta-yare, se me havos tempo, pacienteso e stimulo, me forsan editos li kom libro.

Hike kelka poemi esas pesimista o mem desesperoza. La yaro 2024, ultre la poemifado, esis tre mala por me, ma qua sucias?

Ho, nulu savas
la dio o la kloki
di lo ultima...

(26/06/2024)

Yen eskalero:
acenso e decenso;
nul altra tasko.

(26/06/2024)

Inter la homi
me diletas maxime
la tre kreiva.

(26/06/2024)

Tempope, sola,
me tormentez nul altru
ultre me ipsa.

(26/06/2024)

Serchas kompaton,
forsan, ti qui singlutas.
Sen-sucia mondo!

(26/06/2024)

Singla observo
es digna de poemo,
mem se tre mikra.

(07/07/2024)

La Ido-floro
bezon aquo diope.
Qua irigacos?

(07/07/2024)

Memorez, yuno:
tu es oldo futura.
Moko rikochos.

(07/07/2024)

Ne akumuluez!
Omn avideso finos
en streta sarko.

(09/07/2024)

Frua matino.

Arbor-folii susuras

pro balayisto.

(10/07/2024)

Adam ed Eva.

La unesma karcero

kustis un pomo.

(13/07/2024)

Polexo-levo:
pri ta gesto l'idisti
es tre sparema...

(02/08/2024)

Yen papiliono
qua pozas su sur singla
linguo-floreto.

(05/08/2024)

Tro longa dormo
ne sempre equivalas
ultima morto.

(17/09/2024)

Nur un litero
disting pafo de paco.
Facila chanjo.

(18/09/2024)

Lente, gutope,
nubi sendas, matine,
kolda saluto.

(04/10/2024)

Pro quo nul voko,
nul mesajo, nul penso
a me, de longe.

(04/10/2024)

Quante plu che vi,
ho, versi de Japonia,
tante plu che me.

(04/10/2024)

Ne ecelas el
per korpo nek per mento.
Pro quo l'atrakto?

(04/10/2024)

Facila futuo.

Yen forsan sola luro
en elua nesto.

(04/10/2024)

Sovaj konkurso.

Ocilas kaudi turbe.

Spermo-koboldi.

(04/10/2024)

Poka recevo
po multa dono. Tale
tranesas vivo.

(04/10/2024)

Ido miniona
koncentras pensi densa
en versi kurta.

(04/10/2024)

Kolombo homon
imitas, eskaleron
acensas salte.

(11/10/2024)

Esez ne velko
morto mea, ma subit
cerebro-halto.

(11/10/2024)

Nulu expektez
hike, ye singla dio,
maestro-verko.

(13/10/2024)

Indiferenta,
inerta, muta, blinda,
nigra nihilo.

(15/11/2024)

Ka tu audacos
trachar la tenuta filo,
qua tro doloras?...

(15/11/2024)

Feko, famino,
fraudo, fripono, falio,
forcato, flogo.

(16/11/2024)

Onklulo korde,
multa skriptisti pafe,
trovis solvuro...

(16/11/2024)